

摘藻堂四庫全書薈要

集部

欽定四庫全書薈要

集部

誠齋集卷四十一

詳校官助教臣謝登雋



欽定四庫全書薈要卷一萬五千六百十七

集部

誠齋集卷四十

宋 楊萬里 撰



詩

退休集

讀貞觀政要

拔士新豐逆旅中  
懷賢鴨綠水波東  
酒傾一斗鳶肩客  
醴設三杯羊鼻公

七月十一夜月下獨酌

今歲秋陽曬人死今宵秋月呼人起  
月光如水澡吾體  
月色如霜凍吾髓老夫畏熱如於菟  
平生愛月如冰壺  
望舒可客不可孤  
翹生可親不可疎  
更招玉兔金蟾蜍  
同酌山杯煮澗蔬  
來朝秋陽再作惡  
今夕秋光且行樂  
遮莫參橫并月落

月下聞笛

天色鎔成水蟾光鍊出銀  
碧香三酌半玉笛一聲新  
小

婉還清壯初歡忽苦辛何人傳此曲此曲怨何人

中元日早起

欲借微涼問萬松萬松自熱訴無風清晨秋暑已如許  
那更斜陽與日中

露坐戲嘲星月

東生定西歸月豈不識路何須倩長庚夜夜引行步星  
住月不行星行月不住無人問阿姊此事竟誰主不知  
聽金蟾無乃由玉兔來夜偷此星看月歸何處

蓮子

蜂兒來自宛溪中兩翅雖無也是虫可是荷花窠底蜜  
方成玉蛹未成蜂

秋暑午睡起汲泉洗面

木桶雙擔新井花松盆滿瀉莫留些刺頭蘸入松盆底  
不是清涼第二家

久旱禱雨不應晴天忽落數點

烈日秋來晒殺人青天半點更無雲忽傳天上真珠落

未到半空成水銀

秋日早起

雞鳴鐘未鳴不知鄉晨否起來恐驚衆未敢忽啓牖殘  
燈吐芒角上下兩銀帚定眼試諦觀散作飛電走

晚飲

大醉或傷生不醉又傷情此事兩難處後先有重輕醉  
后失天地餘生底浮萍愁城不須攻醉鄉無此城

送陳壻履常縣丞之官泰

玉潤非冠玉東床忽易東一官新立樣五字后山風  
月來宵共清尊何日同看君即飛兔老我自冥鴻

送羅仲仁試藝南宮

紹興廉吏誰第一君家郎罷真無匹腰纏墨綬不請錢  
妻啼兒號窮刮骨清無人知有天知四圉三個攀桂枝  
不應一箇獨見遺今秋君與一鶚飛君不見吾州狀元  
晚得意董公五十有三歲君今加渠更三年春風射策

君勉旃

君之父元亨為東安令秩滿俸錢千餘緡未得委之而去



古風送劉季游試藝南宮

西溪先生劉夫子箇是國士天下士  
家庭孝友春裏風義氣寒高秋後水  
良齋薦書咄九關重華表閭上半天  
人寬有德却無位天報芝蘭滿堦砌  
諸孫箇箇九鳳雛此郎軒軒千里駒  
槐花再登鄉老書桃花一跳化龍魚  
堂上雙親黑頭在日喚子孫倚門待  
綠衣錦上千載鮮還成西溪讀書債

送廬陵宰黃伯庸赴召

君寄梅花道別腸我扳官柳送歸艎東都循吏似名茂  
南浦詩人更姓黃白鷺青原留惠愛蒼苔紅藥入篇章  
故人若問誠齋叟化作沙鷗弄夕陽

同劉季游登天柱岡

兩箇胡床小憩些一枝筇杖拄傾斜煙雲慘淡天將雪  
風日荒寒梅未花人去客來沽酒市雞鳴犬吠埜人家  
清游不用忙歸去強管行程是暮鴉

我行誰與報江楓旋擺旌旗一路紅朔吹崩騰危兩耳

東山踊躍獻諸峰松陰好處皆亭子瑤草香邊即狻猊  
漸陟漸高元不覺忽然身在半天中

又絕句

穿青度碧白雲中山正奇時路忽窮引道老農辭我去  
與君更上最高峰

偶然乘興上孱顏若待偷閒何日閒脚力到時皆我有  
不須更問是誰山

夜飲

夜飲空齋冷移歸近竹爐酒新今晚醉燭短昨宵餘紫  
蕨拳來大黃柑蜜不如醉中得五字索筆不能書

飲酒無奇訣且斟三四分初頭只嫌淺忽地有餘春身  
外多少事燈前子細論絕憐青女老忍冷撒瓊塵

不睡

夜永無眠非為茶無風燈影自橫斜擁裯仰面書帷薄  
數盡承塵一簾花

望後更深月未明暗蛩凍得總無聲閒心幸自清如水

萬感還從不睡生

清愁無數暗相隨  
酒是渠讐也是媒  
醉裏不知何處躲  
等人醒後一時來

眊睪渾如病酒初  
冬烘又似酒醒餘  
睡鄉幸有閒田地  
不放詩人僦一居

醉吟

十載人間樂與憂  
幾曾半點到心頭  
梧桐葉上秋無價  
蟋蟀聲中月亦愁  
暮角曉鐘何日了  
蒼顏華髮此生休

吟顛醉蹶知無益利走名奔有命不

三春草草眼中過未抵三冬樂事多燭燭雙了紅再合  
酒花半蕾碧千波孤寒霜月儂相似跌宕風雲誰柰何  
道是閒人沒勲績一枝樵斧一漁蓑

烏白燭

白燭光寒淚亦收白燈十倍蜜燈休忘情也似誠齋叟  
燒盡心時不淚流

送王文伯上舍歸豐城兼簡彭侍郎

碧落先生少可人銀鈎繭紙苦稱君談間口吸西江水  
句裏家傳南浦雲千里端能來命駕一尊得與細論文  
還家剝草三千牘看策平津第一勲

題曾良臣思堂

曾尉良臣迎母王於樂氏母許新居成即歸於  
是築第高沙母欲遷而逝乃虛中堂榜之曰思  
求詩為賦四韻

謝墅新成了潘輿竟不歸升堂仰遺像下拜泣沾衣反

哺烏何在卧冰魚自肥夢中環佩響驚喜覺來非

送彭子山提刑郎中赴召

帝想丹青憶老成公兼竹潤更蘭馨獨追洙泗人無訟  
再使成康世措刑召節自天回使節郎星朝斗作台星  
花邊獨坐黃昏句剩寄江西白鷺汀

瓊樹初瞻二紀中玉京再別一星終我隨病鶴歌黃帽  
公駕雲龍上碧穹寄跡絲綸紫薇閣押班冠劍大明宮  
錦園尚欠桃栽否兒輩河陽待曉風



送族弟子西赴省

吾家詞伯達齋翁阿季文名有父風  
筆陣千軍能獨掃  
馬羣萬古洗來空  
嗟予還笏歸林下  
看子乘船入月中  
淡墨榜頭先快睹  
泥金帖子不須封

寄題福帥張子儀尚書禊遊堂

子儀之祖全真參政紹興初元為福帥於三山城  
西外南湖上作堂名禊遊後子儀帥福再新此堂  
自作記以書其事以石刻示予因寄題七字

祖孫接武契堂前風物重新六十年無恙釣衡舊棠蔭  
有光台斗繼蒲鞭手提西郭三山月下照南湖萬頃田  
不要外人來作記當家自有筆如椽

南溪弄水回望山園梅花

梅從山下過溪來近愛清溪遠愛梅溪水聲聲留我住  
梅花朶朶喚人回

火閣午睡起負暄

火閣紅銷雪尚香睡魔引我入渠鄉覺來一陣寒無奈

自掇胡床近太陽

黃菊雙枝已懶殘  
瑞香紫笋政團欒  
盆池影裏看題壁  
上字還成下字看

晒衣

亭午晒衣晡褶衣  
柳箱布襪自攜歸  
妻孥相笑還相問  
赤脚蒼頭更阿誰

讀張文潛詩

晚愛肥山詩自然  
何曾綉繪更琬鐫  
春花秋月冬冰雪

不聽陳玄只聽天

山谷前頭教說詩絕稱漱酒埽花詞後來全集教渠見  
別有天珍渠得知

壬戌人日南溪春景

坐看青天起白雲化成龍子繞銀鱗霎時塞得青天滿  
只見龍鱗不見身

春暖溪暄出小魚沉浮上下巧相娛一跳一浪錢來大  
開作瑤環忽尺餘

翡翠驚飛不作行沙鷗亂下自成雙一天霞綺沉波底  
便是西川濯錦江

雨後至溪上

夜雨無端忽曉晴南溪便長半篙清斜衝亂石雪霜碎  
快瀉深波金玉聲慢處回頭縈作漩急邊眨眼不留行  
李成覩著如何畫却是詩中畫得成

寄題太和宰趙嘉言勤民二圖

歲歲桃花水到時埜船客子命如絲趙侯小試濟川手

雪浪翻天不濺伊

右題逋濟渡船圖

半山辱國賈鼓祠鍾步諸坊卷酒旗村裏山農語音好  
孔方兄已赦鶯兒

右題停罷坊場圖

上元前一日遊東園看紅梅

欲折紅梅朶看來不忍攀週迴尋四處恰得一枝繁

又

偶看紅梅到小園憑欄送眼過前村山頭茅屋隔孤樹  
籬外行人出半身

兒牽黃犢父擔犁社鼓迎神簇紙旗不是豐年那得此  
今春大勝去春時

南溪薄晚觀水

誰將沙礫壅隄斜水怒衝隄自決沙無數小魚齊亂跳  
琉璃盤底簸銀花

溪邊月上

正月十四夜如何月便團似知吾輩出預借上元看  
片子黃金餅看來只管高忽然落溪水雜碎作銀濤

同才翁弟游東園

東園老徑半莓苔老子多時不到來一巷江梅都落盡  
祇今開底是紅梅

近故太師左丞相魏國文忠公挽歌辭

孝廟深知已今皇正宰官一言能定國二聖得重權立  
節山相似容人海未寬至今死諸葛敵使膽猶寒  
鎮蜀雙清獻回天再子明何曾動聲色一笑付權衡臨  
絕緣憂國平生不近名中興賢相傳日月奪光精



栢府公峨豸荆溪我把麾聞風無半面折簡兩相知偕  
掾膠投漆分襟雲與泥樓成扁山浦洒淚一題詩

近故魏國夫人盧氏挽歌辭

胄出開元相賢稱魏國嬪祇教紀彤管不見轉鴻鈞瓜  
葛春風裏蘋蘩南澗濱古今書列女仁孝幾何人

唐代崔家母升堂乳阿姑姑言吾報婦孫孝婦如吾此  
段前無古夫人獨與俱祇看秦國語更恐李唐無

素節勤仍儉清風冷似冰秋衣孟光布夜績敬姜燈拱

木霜何早同瑩雪政疑郎君一變足再看九霄鵬

東園探桃李

偶逢一徑李花開從此東園日日來更約桃花同折好  
紅紅白白兩相催

有花無葉也孤寒有葉無花草一般最是桃花饒態度  
醉紅嬌綠惱人看

李花

李花宜遠更宜繁惟遠惟繁始足看莫學江梅作踈影

家風各自一般般

春晴

日透微風暖風柔嫩日佳祇知趲桃李不道落梅花  
寄題太和丞沈君公館亭臺四詠

真清亭

蒼髯秦大夫瘦骨孤竹君主人似二子二子似主人  
特秀亭

秋月弄長江平地點遠岫贊府詩句中字字江山秀

成蹊亭

紅雨未隨風白雪忽滿枝今當正月尾政是斷腸時

讀書堂

庭散紙尾驚窓聚案頭螢無端循除水也學夜誦聲

寄題分宜李克明上舍高居二詠

不礙雲山樓

想見謫仙喬卷簾雙眼寒雲山千疊碧飛舞入欄干

東塾

一鳳領四雛夜作吾伊聲梧桐高拂日好去瑞堯庭

春寒

風日晴暄一併來桃花告報李花開待君減盡衣裘子  
夜色春光特地回

和張寺丞功夫八絕句

約齋太瘦古仙真寄我詩篇字字新受業陳三能幾日  
無端參換謫仙人

古來官職妬詩篇二物雙違不肯全君被詩篇折官職

如何又寄一新編

與子相望天一方有書無使倩誰將  
歸鴻欲下還飛去  
不作書郵有底忙

金華不敢比東坡此後東坡爾許多  
擾擾胸中百周孔  
不愁柳柳笑人何

問訊南湖作麼生日撞金玉奏英莖  
無人打殺淨飯子  
放出渠頭七步行

新歲南湖春又濃海棠舊入我詩中  
別來君有相思字

寄與江西花信風

湖邊花底舊論詩，再要尋盟今日違。  
道是鶯啼無點淚，教鶯聞此也垂洟。

斷當湖山我與公，問公別後却誰同。  
一生海內金石友，萬事人間牛馬風。

謝襄陽帥楊侍郎用轆轤體

合志同宗憶嗣清，尋盟繼好感難兄。  
關西伯起今夫子，後世子雲垂易經。  
金薤銀鈎詒妙墨，貂裘玉札寄交情。

本朝未有楊家相留待公歸作景星

王式之直閣不遠千里來訪楚人贈以佳句

次韻奉謝

君才陸海與潘江句裏寒芒萬丈長  
雪碗冰甌翻筆墨錦機綉段出肝腸  
王家龍鳳重英特謝砌芝蘭有耿光  
相國登庸衣鉢在郎君努力續前芳

寄題張縣尉敬之南昌官寺重新子貞祠堂

梅郎絳節朝玉臺朝遊五城莫九垓  
遺民香火蒼遺愛



何年祠屋荒蒼苔劍津詩客子張子住持仙壇判山水  
上書台斗大居士作緣水漕皇華使二臺併檄孔家兄  
經始新祠不日成西山南浦作賀賓桮梅官柳俱歡聲  
送趙吉州判院罷之移路提刑

趙侯邁往隆準孫末年五十專三城千里秋毫無遜情  
兩眼洞照如秋鷹何須奮髯走百吏棠陰晝寂清如水  
年年吉州喚賤米農子踏歌凍黎喜去冬苦暖未有梅  
使君一笑梅花開夜吹平地一尺雪留下豐年今歲回

使星一照天西去白鷺青原遮不住即隨丹詔歸握蘭  
遂持紫橐甘泉班

雨中入城送趙吉州罷之

拂溪楊柳縷生金攔路山礬香殺人不是衝關送行客  
外頭放過若干春

村店農忙半不開入城客子去還來阿耶烏傘兒青笠  
賣却松柴買菜回

宿城外張氏莊蚤起入城

燈火頻挑只管殘雨聲終夜惱空山幸蒙曉月多情白  
又遣東風抵死寒

破店無雞報五更只將夢覺當鷄鳴忽忽上却籃輿子  
隔壁人家政睡聲

眠雲跣石十餘年回首拋官一瞬間送舊迎新也辛苦  
一番辛苦兩年閒

次公秩滿來歸偶上巳寒食同日父子小酌  
又是一年修禊時何須曲水泛金卮遍嘗衆酒少亦醉

坐到三更眠未遲上巳巧當寒食日春風慳放牡丹枝  
白頭父子燈前語忘却江湖久別離

送金九度教授辭滿赴部改秩

金華唐呂兩儒先夜半黃梅君併傳不日經筵坐重席  
暫時官舍冷無檀引班曉漏槐楓裏出宰春風桃李邊  
莫遣垂楊知別恨一篙新漲解歸船

嘗茶麤酒

予與客嘗茶麤瀉酒客求其法因戲答之

月中露下摘茶蘼  
瀉酒銀餅花倒垂  
若要花香薰酒骨  
莫教玉醴濕瓊肌  
一杯墮我無何有  
百罰知君亦不辭  
勅賜深之能幾許  
楚人時復一中之

劉季澄投贈新詩次韻為謝

君操筆耒啟新畬  
畊偏西溪萬卷餘  
藜杖芒鞋來得得  
柳風花雨政踈踈  
起家人物孫如祖  
驚代詩文我愛渠  
努力收科無早晚  
不須燈下獨長噓

饒洪帥張伯子華學尚書移鎮京口

周家天球祇一隻張家今有雙白壁前稱紫薇後文昌  
衙官二陸僕兩唐金章玉句迭清鏘天孫雲機織錦囊  
松心竹節爭老蒼冰壺水鏡明秋霜君不見于湖先生  
掌綸綍二典三謨纔一筆君不見篤素先生立朝端五  
臣十亂半武間聽履星辰踐台斗翻身鳳池屈伸肘夢  
入飛雲捲雨簾袖却築巖作霖手滕王閣上呂阿舒春  
生秋殺震江湖吏部未見張尚書春生儘有秋殺無江  
西十州百萬戶父非姓名母非杜也祇周人兩句詩豈

弟君子民父母又去南徐作好春落霞秋水亦眉顰南  
徐父老錯欣欣玉皇催渠轉鴻鈞

春雨不止

無計奈何春日長  
宰予介紹謁羲皇  
蟻纔問陣天又雨  
蜂欲舂粮花正香

春雨如毛又似埃  
雲開還合合還開  
怪來春晚寒如許  
無賴桐花領取來

踏青

水換溪溪玉花呈嶺嶺春秧田暄處蚤茅屋補痕新

寒燈

老穉都眠我獨醒寒燈半點伴三更  
雙花忽作蜻蜓眼孤燭仍懸玉胆瓶

雨後獨酌

清明未到未和柔過了清明春又休  
燭下看花偏有思醉中聽雨也無愁

瓶中淮陽紅牡丹落盡有歎



只愁風雨妬花枝剪入瓷瓶養却伊更下重簾深閉閣  
忽然花落又關誰

眼中姚魏過忽忽只有淮陽打底紅杜宇一聲花睡醒  
却教老子怨東風

人是明年看牡丹未聞芍藥怯春寒落英滿地不須埽  
一片鳶紅也足觀

寄題龍泉李宗儒師儒槐陰書院

龍泉二李繼謫仙朝議朝散相後先鳳雛二妙繼乃祖

宗儒師儒昆弟賢手種槐樹今幾年日茹葉淘呻斷編  
陰似王家三樹綠異時官職追前躅花作唐人八月黃  
來歲能書催趣裝

李師儒上舍稽古堂

青楓金剝依然在黃石圯橋元不改只有謫仙稽古堂  
兵燒水毀草樹荒二大夫家有孫子去珠復還堂復起  
朱甍碧瓦掃金波牙籤玉軸柱銀河山鬼吹燈聽夜誦  
秋兔獻穎供晨哦向來二李名父子今來二李佳兄弟

鵲鴿雙去集上林李家大夫看二二

誠齋集卷四十

欽定四庫全書薈要卷一萬五千六百十八

集部

誠齋集卷四十一

宋 楊萬里 撰

詩

退休集

初夏即事十二解

蓮葉頭巾道樣裁  
仙桃扇子午時回  
撲蠅墮地猶能旋  
閉閣生塵向底來

瑞香端合譜離騷有子傳芳韻亦高失却薰籠紅錦被  
化為矮樹紫櫻桃

百日田乾田父愁只消一雨百無憂更無人惜田中水  
放下青溪恣意流

從教節序暗相催歷日塵生懶看來却是石榴知立夏  
年年此日一花開

檻中紅藥趁春歸瓶裏荷留三兩枝一片落來能戀我  
葉梢閣住不教飛

蚤有花紅綠刺長似來作伴石榴芳金櫻身子玫瑰臉  
更喫餕枝蜜果香

玉磬金鐘天半鳴夢中驚我起來聽萬松花上三更雨  
政事堂中有此聲

東渚西陂萬馬奔浪花吞盡舊波痕山童莫掃中庭水  
要寫錢錢兩點文

更無一箇子規啼寂寂空山花自飛啼得春歸他便去  
元來不是勸人歸

柳外花梢啼亂鶯行人過盡不曾聽得人聽處君知麼  
天欲明時第一聲

狹斜只解賞春紅秋菊冬梅不負公我道四時俱富貴  
枉催換藕一家風

王家塵柄綠瓊香萱草偷來柄更長藏却柿紅纓掃子  
菖蒲節裏放風光

詩酒懷趙德莊

舊日張三影今時趙半杯誰將牌印子牒過草廬來一



代風流盡餘年鬢髮催愁邊對詩酒懷抱向時開

趙德莊每

對客不渝名必傳觴半杯笑謂客曰某名趙半杯君知否余老病不能飲半杯故云

### 紀聞悼舊

莫說湘南寺令人絕痛渠中間緣國論偶似絕交書衫短枯荷葉牆高過筍輿人生須富貴富貴意何如

### 郭母孺人李氏挽歌辭

李郭俱名族華嫻合兩家藁砧巾角雨郎罷筆頭花樹秀庭雙玉孫榮砌萬芽半生冰雪節再賦白山茶

七字敬餞周彥敷府判直閣之官虎城

碧落仙人出作州青原詩伯左承流江山得助催新句  
風月平分入勝游清獻濂溪兩賓主崆峒章貢再賡酬  
舊時綠水紅蓮客南望旗幟鬢已秋

僕五十年前為貢掾

端午前一日含笑初拆

一點瓜香破醉眠誤它酒客枉流涎如何滴露牛心李  
化作垂頭玉井蓮初喜曉光將莞爾竟差午影不嫣然  
忽看吐下金櫻核款款聲乾暮葉邊

端午獨酌

招得榴花共一觴  
艾人笑殺老夫狂  
子蘭赤口穰何益  
正則紅船看不妨  
團粽明朝便無味  
菖蒲今日麼生香  
一生幸免春端帖  
可遣漁歌譜大章

送吉州通判趙德輝上印赴闕

太守九秋霜  
通守三春風  
太守鏡照膽  
通守淵涵空  
古來人才在寒士  
皇家人才在宗子  
君看二趙作廬陵  
寬猛晦明兩相濟  
太守已乘八使車  
通守合分五馬符  
行

看二趙俱法從老夫別獻中和頌

暑中待月小酌

火傘朝張暮復張若教無月底禁當隔林欲上光先漏  
窺戶無多氣已涼萬里無雲天似水一奩新鏡色如霜  
廣寒宮裏應無酒挽住姮娥勸一觴

夏日小飲分題得菱用轆轤體

不是齊堂敲鯨生如何雙舐獨崢嶸犀中忽有紅尖角  
天上也無甜底冰只愛衣裳桃杏淺誰知肌骨雪霜明

酒徒若問渠名姓無姓無名字子陵

移床

清晨暑氣已愁予何況暘垂午及晡尋得松風小涼處  
移床來坐又還無

午睡起

永晝能不倦亭午思小睡竹床熱如晒展轉竟無寐起  
來搔白首百匝繞簷際政當眊矐中忽有一奇事一風  
北戶來穿度南窓外窓外蕙初花披拂動香氣老夫得

一涼洒然有生意來日當此時未知復何似

送章漢卿歸宣城

緯

竹葉孤斟久梅花遠信疎如何窮巷轍忽枉故人車伯仲俱佳士雲霄政望渠相從又相別欲別重躊躇

夏夜喜雨

聽雨初假寐還成睡著休夢中簷奏樂夜半簟知秋今歲應須熟餘生有底愁無人知喜事課僕織新篛

題長沙鍾仲山判院岫雲舒卷樓

天柱峰尖半點雲散為岳麓橘洲春盡供詩客揮毫裏  
怪底春空態度新

入夜雲來宿雨窓明朝雲去照三相也知遠岫無心出  
解后為霖亦不妨

立秋日聞蟬

老天薰人欲破頭喚秋不到得人愁夜來一雨將秋至  
今晚蟬聲始報秋

二含笑俱作秋花

秋來二笑再芬芳  
紫笑何如白笑強  
只有此花偷不得  
無人知處忽然香

秋夜極熱

只怨西風不早歸  
暑歸何似且歸遲  
姮娥一夜搖團扇  
更說明朝日午時

秋神今歲也痴狂  
行李如何草草回  
白帝羽衣渾不帶  
炎官火傘却將來

葵扇頻揮手已麻  
竹床偏熱冷無些  
面涼却感鬚根汗



省得開門汲井花

題安福劉虞卿敏齋

君不見杜家阿宜開雪窓日讀十紙月一箱君不見崔  
家阿立染霜兔暮作千詩朝百賦讀書臺北邠金刀齋  
中不種李與桃滿堦只種書帶草黃金非寶書為寶郎  
君玉樹臨風前咀嚼青竹夜不眠何須多羨崔與杜諸  
郎努力青雲路

九月三日喜雨益不雨四十日矣

玉帝愁聞早雷公怒見鬚搜龍無驛處倒海不宜餘稻  
裏雲初活蒼梢雪再鋪老農啼又笑欲去且安居

謝蘇州使君張子儀尚書贈衣服送酒錢

香山老益宴欲買宅與田荆南贈春服侍中送酒錢何  
如韋蘇州一日兼兩賢酒錢隨春服併至南溪邊寄物  
已不輕意更在物先僕也拙生理巧亦營不前病廢非  
為高拋官十餘年紙田蝸牛廬縱賣誰作緣故人豈云  
少衮衮青雲端王弘不可作范叔空自寒忽緘蘇州書

冷窓自春暄急禡九月締徑追八酒仙竹煙為我喜波  
月為我妍籬菊凍不花一笑亦粲然醉中化為蜨飛墮  
虎丘山齊雲已在眼忽然遠于天

南溪僕所居村名竹  
烟波月用來教語

九日招子上子西嘗新酒進退格

但令有酒對籬東管得山名不是龍  
榨裏潑醅迎節裏雨中移菊自城中  
多時不飲今辭醉一笑相懽古罕逢  
我輩明年當更健不須子細看莢紅

九日菊未花

舊說黃楊厄閏年今年併厄菊花天但按青蔬浮新酒  
何必黃金鑄小錢半醉嚼香霜月底一枝却老鬢絲邊  
阿誰會得開遲意暗展重陽十月前

寒雞

寒雞睡著不知晨多謝鐘聲喚起人明曉莫教鐘睡著  
被他雞笑不須嗔

南溪上種芙蓉

夾水芙蓉密密栽綠溪斜立照溪開放教十里紅將去

不盡溪流不要回

曉看芙蓉

兩歲芙蓉無一枝今年萬朵壓枝低  
半紅半白花都間  
非短非長樹漸齊  
臨水醺粧新雨後  
出牆背面曉風西  
春英笑殺秋英淡  
祇恐濃於桃李蹊

瑞慶節日同王式之詣雲際寺滿散

金刹深藏翠巘間  
鐘聲吹下白雲端  
誰知東浙能詩客  
也到南溪祝聖山  
重碧青池染衣濕  
軟紅香霧襲人寒

祝君來歲千秋節著脚含元鵝鷺班

寄王用之判府監簿

兄弟八人

寅清堂上初相識君如玉樹逢春碧滕王閣下重相從  
君如天驥追秋風九州四海王魯公有子不減漢八龍  
君才況是廊廟具登庸衣鉢親分付筭班小試雲霄步  
抽毫妙琢湖山句君不見西華韋家父子間阿成官職  
似阿賢皇朝呂家也不惡大申小申相後先看君一武  
追韋呂奄有龜蒙再封魯

王式之命劉秀才寫予真因署其上

淞水東兼淞水西千岩萬壑總遨嬉遊山祇欠金華債  
桑興今隨王式之

久雨妨於農收因訪子上有歎

君能過我意如傾我每看君脚便輕若為泥涂間還往  
端令老病底心情未霜楊柳秋猶碧就水芙蓉晚更明  
早歲嫌晴不嫌熟今年教熟不教晴

益公題三老圖

郡士劉訥以乘成兄生於己巳而予丙午誠齋  
丁未寫三老圖為題四韵

同辭官路返鄉閭兩驢驢中間以駕前後顧瞻羞倚玉  
支干引從偶連珠三人不必邀明月九老何妨續畫圖  
從漢二疏唐尹後相親相近此應無

劉訥敏叔秀才寫乘成先生平園相國及予  
為三老圖因署其後

旦奭行間著季真黃冠不合附青雲二南風裏君知麼



添箇毒蛇退食人

劉君寫照妙通神三老圖成又一新只道老韓同傳好  
被人指點也愁人

南溪堰灘

為愛溪流箭樣湍戲拋亂石障清瀾忽如亞父撞玉斗  
又似仲尼鳴象環整北移南教儘怒從朝至午不知還  
便饒艷潁三巴峽也當龍門八節灘

至後入城道中雜興

至後寒梅未苦煩  
鵲前暖蝶已偷還  
隔林日射池光動  
碎却池中倒影山

大熟仍教得大晴  
今年又是一昇平  
昇平不在簫韶裏  
只在諸村打稻聲

問渠田父定無饑  
却道官人那得知  
未送太倉新玉粒  
敢先雲子滑流匙

畦蔬甘似卧沙羊  
正為新經幾夜霜  
蘆服過拳松過膝  
北風一路菜羹香

長亭阿姥短亭翁探借桃花作面紅  
酒熟自嘗仍自賣  
一生割據醉鄉中

豐年物物總欣懽不但人和畜亦蕃  
簸處金膚肥晁母  
春餘珠屑飽雞孫

山路肩輿倦僕夫家兄為我酒頻沽  
賣薪人散知城近  
歸柳烏忙覺日晡

誰練茗花作雪茸更將楓葉染猩紅  
姮娥不認推青女  
青女又還推化工

忽見輕綃三兩重橫遮萬丈翠屏風老夫細熨髮鬆眼  
却是青原隱霧中

春時宿處雨浪浪至後重投張氏莊際晚烏雲何許買  
夕陽特地戀寒窓

歐陽伯威挽詞

酒魄飛穿月詩星流入脾豪來無一世貧不上雙眉爐  
水竒唐律香城賞楚辭前身定東塾又得退之碑

銘

益公  
作誌

題東江劉長元勤有齋

蠹簡三更寂寒燈半點慳不知門外雪已失月中山白  
壁非愁禹黃金只鑄顏時來漫拈出掇取桂枝還

謝永新大夫楊叔裕惠詩

今代吾家後子雲新詩也解乞

去聲

陳人銀河波浪滄滄

玉花縣風光字字春大勝十年燈火讀更無半點簿書  
塵鴟章塞得公車破便合留渠立紫宸

寄袁起岩樞密賀新除仍謝送四緘并詩集

兼懇求陳壻薦書

樞相身通貴恩書意轉親四端香雪縠一卷錦江春公

即專堂印儂方理釣緇五公今果六詩識也如神

僕舊有詩

寄樞密云四世

行看五六云

知己熙鴻化陽和被九臯自憐今老病無分惱釣陶獨

念東床客猶沉左選曹春風半張紙立地作宜教

朝士謂宣

教為宜教

再入城宿張氏莊早起進退格

夢覺月如晝誤驚天欲明起吹松葉燼自點柏花燈山  
轎已十里譙門纔四更脚根豈無火鬚上也成冰

與次公夜酌

湯盂深淺任橫斜酒力微醺略略些剪燭小童殊解事  
不留燭燼却留花

不寐

脚底神通也自強三更報我有飛霜人言冬夜長如歲  
不寐方知歲不長

望

也知口業久消磨造物嗔人奈口何  
莫管詩人例寒餓  
且容老子小婆娑

埜童擷菜疎移步客子追程有底忙  
茅屋破時偏入畫  
布衫洗了晒枯桑

瑞香盛開呈益國公二首

近看丁香萬粒攢遠看却與紫毬般  
誰將玉膽薔薇水  
新濯瓊膚錦綉禪  
淨界薰修兩芬馥  
無人剪剔自團圓



下元前至上元後省得龍沉與麝蘭

針來大笋束仍攢作麼開時色兩般荀令金爐炷沉水  
昭容紫袖襯中禪同花異葉株株異一種藥枝節節藥  
雪裏寒香得三友溪邊梅與畹邊蘭

余處恭少師左相郇公挽辭

上聖臨三極維師正百工忠清兩楊綰誠一再溫公衡  
岳摧天柱明堂失棟隆初元得名相不待卦非熊  
孝廟乘乾日光宗宅震宮變龍池集鳳黃綺翼如鴻初

政扶皇極三朝抗大忠暮年坐黃閣萬古一清風  
天下非一士胸中自有人如何初拜相首薦一遺民恩  
我丘山小懷公骨肉親白頭哭知己東望獨傷神

寄題龍泉項聖與瀘溪書院

三顧先生得麟筆付囑遺經得第一獨將麟髓飲澹翁  
項家阿英亦其乙澹翁孤忠貫兩儀阿英卓行徹九扉  
旌門一日插天半却把此筆傳阿宜阿宜阿固續弓冶  
瀘溪書院聲無價不論當家與外人不日天池看渾化

忠簡胡先生與項德英同師蕭子荆先生  
傳春秋學蕭先生自號三顧隱客

送西昌大夫趙嘉言上印赴闕

西昌難作

音佐

自古傳卓令趙令不作難二令來時民頓

寬二令去日官餘錢從來美政人難繼二君雙美今誰  
似卓令已作中都官趙令也合即綴卓令班

山茶

樹子團團映碧岑初看喚作木犀林誰將金粟銀絲贈  
簇飣朱紅菜碗心春早橫去聲招桃李妬歲寒不受雪霜

侵題詩畢竟輸坡老葉厚有稜花色深

東坡山茶詩云  
葉厚有稜犀甲

促花深少  
態鶴頭丹

夙興待旦二絕

覺後難重睡醉餘還獨醒東窓不肯白挑盡一燈青

村裏無銅漏金雞管殺更百聲猶未曉却等第三聲

癸亥上巳即事

怪底風光好還當上巳辰柳鶯樊素口梁燕趙家身花  
落春容瘦陰濃夏意新晒書仍焙藥幽事也勞神

登度雪臺觀金沙茶蘼

金沙瓶子茶蘼粟一一尖園映紅玉只銷三日雨和風  
化作真珠堆錦褥繞梁飛度雪前開開了却吹香雪來  
紅紅白白照天半醉倚瑯欄眼凌亂

古風敬餞吉州梁使君

南方儒先園三山中豹蔚推伯鸞手拏枝桂下廣寒  
身作德星南斗間治行第一聞九關再分魚書朱兩幡  
豐湖夜獻坡老門螺浦晚酌六一泉露冕期月惠化傳

青原改色白露妍白叟鼓腹黃童顛麴生打開禁酒關  
雲子湊集移粟船向來醉人號一瑞如今醉人橫路眠  
滿城米賤酒更賤盡道人間有二天如何癖愛香火緣  
三章叩閭覓散仙定知不晚當賜還金貂玉佩香案前  
古風敬餞都運煥章雷吏部祗召入覲

高帝中興社稷臣紫岩先生第一人來從紫岩住紫蓋  
鴻鈞轉作湘中春風流人物被草木香滿橘洲連岳麓  
一時賓客盛鄒枚明月夜光和結綠雷家夫子龍鳳章

優入其室升其堂朱幡玉節徧南紀錦帳綾衾推望郎  
使星下照翼軫旁西山南浦回風光渠儂別有經世具  
袖却兩手惟深藏玉皇喚渠登廟廊小却猶在持橐行  
楚人亦忝同門者久挂衣冠卧林下病身只合釣煙波  
兒輩猶堪累甄冶

子年劉郎寫余老貌求贊

髻少梳欲無髭短鑷更少搔鬢祗撚髭覓句何日了

暮行田間

布穀聲中日脚收  
瘦藤叫我看西疇  
露珠走上青秧葉  
不到梢頭肯便休

水滿平田無處無  
一張雷紙雨中鋪  
新秧亂插如井字  
却道山農不解書

清曉趨郡早炊幽居延福寺

小轎歇還正荒蹊  
細又紆危峰上金鏡  
遠草亂瓊珠霧  
外鐘聲近花梢  
殿脊孤老僧知我冷  
展席傍紅爐

午過烏東



險盡途初坦寒輕日向中  
稻雲遲雨碧蕎雪早霜紅  
五日再行役二年三鞠躬  
只言棄官好却與在官同

晚宿小羅田

青林化作萬黃金  
落日光寒色却深  
似看松梢數松子  
不妨更與數松針

倒盡菰蒲朽盡荷  
芙蓉臨水恨無多  
一枝却有兩花影  
東卧斜陽西卧坡

瀟灑低低屋虛明  
小小窓客閒  
那得許窓外更寒江

白酒聊三盞青燈欲二更倦來乘急睡過了睡難成

後一日再宿城外埜店夙興入城謁益公

吹燈覽鏡又怱怱烏帽新時白髮空殘月忙追曉星上  
飛霜先到轎窓中如何五鼓寒十倍不肯半分饒一翁  
到得火輪相暖處山扉特地碧朦朧

歸途未信欲斜陽只怪行人影轉長松壽已高猶綠髮  
楓年方少更紅裳秋光便是天金谷畫本偷歸我錦囊  
只怨衝寒嘆行役青鞋布襪却芬香

題胡季亨觀生亭

取觀天地聲  
物生意之義

誰信秋霜臘雪中  
雪中霜裏有春風  
菊花未了梅花發  
休說桃花入嫩紅

漏洩春風有阿亨  
一雙詩眼太乖生  
草根未響渠先覺  
不待黃鸝第一聲

胡季亨贈集句古風效其體奉酬

秋氣集南礧  
清風來故人  
遺我一端綺  
桃李不成春  
大句幹元造  
高詞婉皇墳  
百衲收寸錦  
一字買堪貧  
苦恨

鄰里間良覲渺無因今日是何朝始聞扣柴荆黃菊有  
佳色寒水各依痕且共歡此飲重與細論文何以報嘉  
惠山中有白雲

十月久雨妨農收二十八日得霜遂晴因喜  
而賦之

兩脚麻相似禾頭耳欲生風收白痴霧霜作上牢晴逗  
曉雙栖鵲巡簷叫數聲呼兒洗塵甑忍餓待新秔

早起

黃菊花繁依舊臞牡丹葉落恰如枯霜中蚱蜢凍欲死  
緊抱寒梢不放渠

蠅席六言

長有青蠅入夢初無白額負嵎傳業義皇網罟齊名鬪  
穀於菟

進退格寄張功父姜堯章

尤蕭范陸四詩翁此後誰當第一功新拜南湖為上將  
更推白石作先鋒可憐公等俱痴絕不見詞人到老窮

謝遣管城儂已晚酒泉端欲乞移封

功父詩號南湖集  
堯章號白石道人

寄題八桂張松卿義莊

張氏避毡裘却遷來桂州買田同族食作計豈孫謀公

藝君今是希文古罕儔荆花再連理萱草更千秋

張氏  
避地

自邗來桂此莊松卿奉母夫人  
之命為之夫人高年康強云

陳商卿挽詞

遠緒傳嬌水高風似太丘  
萱堂魚躍雪蘭砌鶚橫秋  
杖履疎金谷鶯花冷玉舟  
行看紫鸞紙告第噴松楸



誠齋集卷四十一



謹案卷四十第八頁後四行南溪弄水回望山園  
梅花原本回訛四据別本改

卷四十一第十四頁前一行自點桤花燈原本桤  
訛舊据宋詩鈔改

第十五頁後六行項家阿英亦其乙原本乙訛一  
据別本改

第二十一頁前六行寄張功父姜堯章原本脫張  
字据別本增



總校官庶吉士臣張能照

校對官庶吉士臣陳墉

謄錄監生臣浦靖

欽定四庫全書薈要

集部

誠齋集卷四十

二至  
五

詳校官助教臣謝登雋



欽定四庫全書薈要卷一萬五千六百十九

集部

誠齋集卷四十二

宋 楊萬里 撰



詩

退休集

題曾世夫頤齋

吾家子曾子滋蘭溪澗幽葯房動波底韋編著

音斫

床頭

夢吞六畫杏身從三聖遊上瞻岐山開下聆雷聲收告

子閱靈龜潛淵騎玉虬食非足自養朶頤非所求一朝  
浮洛書綠字獻禹疇分半啖虞翻相視一笑休

曉起

霜挾清寒凍殺人袖中十指怯頭巾金篦落地拾不得  
却是穿窓曉日痕

日午

揭竿借日自烘衣背立晴暄片子時雪後春生人未覺  
弄絲蟾子獨先知

賀胡守寺正

廬陵新事一奇絕老農七年不識雪使君領取六花來  
一夜九天開玉闕萬家鑄作銀樓臺千峰琢出瓊崔嵬  
頻歲魃鬼崇穠稌來秋雲子如芋魁老夫與雪亦久別  
滕六叅儂求譜說為渠拈此一瓣香今身胡姓前身黃  
只愁潁川歸廟堂不愁寰宇無儂攘東閣官梅應解語  
綠毛么鳳仍能舞合詞再拜壽使君滿為天花中玉醕  
十二月二十七日立春夜不寐

冬夜嫌長只望春春宵又永更何言睫梢強合終無睡  
脚底相摩也不溫竟夕松風聽到曉半明燈火看來昏  
擁裯却起蒙頭坐顧影真成一病猿

送黃幾先司戶

吾爰黃編修用不究其挾有子傳父書潛心泣麀業音  
中石渠賸筆底秋鷹捷蟾兔贈一枝衣鉢續四葉不應  
千里來乃欲一揖別恰當新酒熟幸與故人接細酌且  
短檠軟語更長缺去去謁九扉天路看高躡



寄題南昌尉廳思賢亭

南昌尉廳之右有孺子墓墓前故有思賢亭中  
更兵餘亭毀墓湮今尉劍津張敬之因葺公廨  
披榛得墓按圖牒墓旁有九里井求之得井又  
有毗畊桓伊墓下得甕三款識云晉平南將軍  
墓距聘君墓七里驗其遐邇而信表其墓乃復  
其亭云敬為賦之

有客栖霞外無名浣黨中南州一高士東漢獨清風舊

國有禾女荒阡猶石翁更煩吹簫魄端為洗榛叢

甲子初春即事

六首

老子燒香罷蜂兒作隊來徘徊繞襟袖將謂是花開  
顰去寒猶在春來花未開東風忽然到放盡一園梅  
徑李渾穠白山桃半淡紅杏花紅又白非淡亦非穠  
只有觀書樂其如病眼何但令吾意適不必卷頭多  
驟暖如初夏通身退袂衣只言寒已去却等五更歸  
人怨花遲發天教暖早催不知要催落却道是催開

二月十四日曉起看海棠

過雨天猶濕新晴日尚寒  
懸知曉粧好破霧急來看  
初日光殊薄晴梢露正濃  
弄珠粧未穩更著柳邊風  
晚得看花訣丁寧起絕晨  
乘他醉眠起別是一精神  
四面花光合一身香霧紅  
忽從霞綺上跳下錦城中  
花密無重數看來眼轉迷  
化為花世畧忘却日東西  
外種百來樹中安一小亭  
放眸紅未了紅了是天青  
老子侵晨起蜂兒先我忙  
淵才無鼻孔信口道無香

除却牡丹了海棠當亞元艷超紅白外香在有無間

寄題袁機仲侍郎殿撰建溪北山四景

妙淨庵

韓子不肯佛饒操苦出家何如妙淨老紫橐碧蓮花

冰壺閣

竹園風世畛梅花雪友朋地清無可比且道玉壺冰

玉虹橋

銀河月外來玉虹天上落騎虹弄銀河人間無箇樂

杭雲亭

脚底一朶雲乘之繞空碧前身王子喬今代李太白

題張季長少卿飾菴菴名取告詞云學足以  
自飾

吾友張飾菴學到賁上白真賁初非文至飾亦無色君  
看瑄玉姿豈借青黃飾寶氣不自中白虹貫空碧飾菴  
隱眠嶺英名震京國魯論感鳳嘆春秋辨麟獲孝廟聘  
丘園有來校墳籍光皇訪忠賢再起貳卿棘未應兩朝

舊不侍九重側  
訓詞揭昭回  
聖意深記憶  
盍歸贊人文  
小却猶講席  
未要從子真  
帶月畊岩石

十山歌呈太守胡平一

螺岡市上惡少為羣  
剽掠行旅民甚病之  
太守寺正胡公命賊曹擒其魁杖而屏之遠方道路  
清夸遂無豺虎塗歌  
埜咏輒撫其詞櫟括為山  
歌十解庶採詩者下轉而上聞云

豺虎深交鴈鶩行  
到官官取汝無妨  
只將剽劫為喧鬧

喝放歸來儘陸梁

羣盜常山蛇勢如一偷捕獲十偷扶十偷行賂一偷免  
百姓如何奈得渠

塗客前村荷一豬城門賣得兩千餘明朝回到石斧嶺  
連喫數刀今在無

說似行人且細聽螺岡門外莫宵征前頭石斧韓姿嶺  
第一單身不要行

後趙前丁兩使君羣偷望見總星奔後人却笑渠儂猛

仁及偷兒不及民

丁卿季囚賊土牢  
趙龍之椎折賊脚

王黃二盜久馳聲手捧腰刀白晝行逢著村人持一物  
喝令放下敢誰爭

近有村人帶血論使君親與看傷痕驚行剛道非行劫  
只是行人兩作喧

賢尹如何受吏謾青天白日萬人看忽然一展霹靂手  
盡杖偷魁竄遠蠻

北門今早頓然清懷壁操金儘夜行却有一般可憐底



羣偷枉却費家兄

行人滿路喜歌呼  
小盜何須辱廟謨  
早箇使星歸鼎軸  
為禽頡利繫單于

五月十六夜病中無聊起來步月

拋官放浪十三年底事  
今年病嬾殘舊健  
肯饒梅摘索  
新羸翻羨竹平安

無求不必位三公  
一飽何須祿萬鍾  
只有人生安樂好  
享它明月與清風

人睡方酣雞未知起來教轉月華西南風吹落北斗柄  
細數月中丹桂枝

夏日雖炎夜却清四更還更勝三更露從玉兔鬚根落  
風在銀河浪底生

道是月明星更稀阿瞞此句未為奇今宵斗柄也不見  
一鏡孤懸天四垂

題李季章中書舍人石林堂

紫微仙人今太白不愛好官愛奇石頃從道山歸雪山

一葉漁舟一橫笛船過宣池月滿空  
寒雲飛上九華峰  
十指一掇九芙蓉和月擎取歸船中  
歸到鴈湖秋水碧  
萬斛酒船觴九客  
暮願諸峰作不速  
不待折簡登几席  
儂與石兄殊不疎  
問訊別來安穩無

米元章見奇石具衣冠拜之呼為石

云兄

與長孺共讀杜詩

病身兀兀腦岑岑偶得兒曹文字林  
一卷杜詩揉欲爛  
兩人齊讀味初深  
斲肝枉却期千載  
漏眼誰曾更再尋

筆底奸雄死猶毒莫將饒舌泄渠心

食蓮子

白玉蜂兒綠玉房蜂兒未綻已聞香蜂兒解醒詩人醉  
一嚼清冰一嚙霜

城中蓮子買將歸未問嘗新早與遲偶憶湧金門外曉  
畫船帶露摘來時

戢戢蜂兒出露房未生翅股及鋒芒丁寧莫遣他人剝  
要染儂家十指香

族人同諸友問疾

老無星事可營為政是長閒好病時兩脚倦行羸得坐  
一生欠睡頓還伊夢聞有客欣然起見道勤翁乃爾  
痴抵掌縱橫談亦笑此身安否更曾知

摩詰沈疴未易排文殊一問失妖灾老夫何幸羣賢集  
倒屣出迎雙眼開語造極時全愈了病知客去即重來  
呼兒細揀新書策體不佳時看一回

病中復脚痛終日倦坐遣悶

滿眼生花雪滿顛依稀又過四雙年誰知病脚妨行步  
只見端居例坐禪墮扇几旁猶懶拾檢書窓下更能前  
世人總羨飛仙侶我羨行人便是仙

六月二十四日病起喜雨聞鶯與大兒議秋

涼一出遊山

未伏將催中伏休怱怱送夏又迎秋暑中竹色風仍雨  
病裏鶯聲喜破愁大熟十年無此作微生一飽更何求  
急須剩踏蓮花麴藥玉新船待拍浮

五羊酒法用  
蓮花作麴

病勢初來敵頗強排山倒海也難當老夫笑把東西看  
豎子難成上下狂酒陣時聞報三捷詩壇元不費單槍  
夜來夢入清涼國風月留人別是鄉

暑氣朝來掃地空南風畢竟讓西風秋生楚尾吳頭外  
涼殺天涯地角中萬疊山連千澗水雙行纏伴一郢筒  
初程道是窮忙著且宿東山東復東

雨後曉起看山

晨起出蓬戶換却隔水峰細看只舊山色與昨不同雖

經夜來雨未必有許功雲師挈衆巉置在藍水中沙土  
俱綠浮草樹添青蔥不然近秋哀那得還春容此意殊  
不識要將調詩翁判斷有一語可惜語不工正使語工  
著不如山色濃

病中七夕

良辰美景底須來苦惱如山正滿懷蟬度清歌侑溪柳  
花吹黃雪洒官槐新秋風物俱堪賞久病心情自不佳  
說與兒童休乞巧老夫守拙尚多乖



秋熱

今年秋熱倍常年更住西峰落照村最是櫻桃梢上日  
徘徊不落等黃昏

食菱

雞頭吾弟藕吾兄頭角嶄然也不爭白璧中藏煙水晦  
紅裳左袒雪花明一生子木非知己千載靈均主盟  
每到炎官張火傘西山未當聖之清

晚酌

暑天寒果飮來餒水果清於木果休蓮入新秋何更瘦  
菱沉到底竟能浮山泉釀酒香仍冽埜蔌堆盤爽更幽  
方丈食前非不愛風蟬一腹飽詩愁

七夕後一夜月中露坐

火雲散作罇金雲簷際移床偃病身古井石崖新汲水  
花洲苔砌蕩晴塵風纔小動即停吹竹自不涼那及人  
獨感今宵上弦月桂梢分露滴紗巾

今古詩人愛月圓未堪商畧玉嬋娟修眉半壁各自好

團鏡磨銀俱可憐一夜一般新樣出幾回幾換為人妍  
教渠也學金鴉扇未必清光直一錢

夜熱不寐曉起步溪上

夜氣積到曉微涼方滿川老夫乘早起落月正娟然拄  
杖了疲擔行人憩痛肩勞生誰獨免客路最堪憐

寄題趙漕秘閣東山堂

克夫

阿旦東山著乾坤十雨世界三登村阿安東山著一身  
白雲保社明月鄰此山祇合館此客千載阿誰敢度越

趙侯玉立隆準孫洗空凡馬追古人千山萬水畧行徧  
一錐卓住東洋岸東洋山麓東復東築堂折簡招兩公  
倒提北斗酌銀漢靈山作樽江作鍾浩歌小袖經綸手  
笑與兩公舉天酒東山今屬趙家莊敬請兩公遷別鄉

送吉州解魁左人傑詣太常

年十五

高皇一馬化龍日臨軒策士誰第一玉山山下汪端明  
年才十八第一人聖上來年集英殿黃繖中央橫玉案  
何人再續老尚書永水左家千里駒春秋三傳貯胸臆

買紙待傳晁董策君才蓋與汪相先君年更少汪兩年  
送左元規三詣太常

晉侯三駕楚莫爭薛侯三箭天山平江西今代再丘明  
親到杏壇授麈經筆陣獨掃千人軍兩魁槐花再薦名  
來年蘭省與集英三元不數馮家京

送廬陵宰趙材老

趙侯龍種秀天潢金玉肝脾錦繡腸未復九人黃閣相  
猶堪三子紫微郎饑餐蘭菊枝枝月醉洒雲煙句句霜

誰與邦人誦遺愛老夫端欲續甘棠

唐宋子相者九中人近士趙大夫除

西掖

送項聖與詣太常

盧溪書院一番新千里舉子來如雲天教書院名自起  
速化先從主人始主人主盟為阿誰楚漢名家今項斯  
胸中五車載書卷筆端三峽傾冰硯魯秉周禮說一經  
有司把燭題秋荐鵠袍詣闕柳袍歸它年書院更光輝  
淋疾復作醫云忌文字勞心曉起自警

半似枯禪半似痴也無何慮與何思偶看清曉雙雙蜨  
飛徧黃花一一枝

荒耽詩句枉勞心懺悔鶯花罷苦吟也不欠渠陶謝債  
夜來夢裏又相尋

題朱伯勤千峰紫翠樓

秀嶺西頭鳳嶺東周遭畧數一千峰商量沒頓新樓處  
頓著音灼穠藍醺紫中

一色千峰翠作圍忽然齊換紫綃衣客來欲識樓中景

祇等金鴉浴海時

易允升畫像贊

髯疎撚欲無髮短搔已禿定知得句來暗喜見眉目

嚴陵決曹易允升自官下遣騎歸寫予老醜

因題其額

玉泉半潭冰釣臺萬壑雪汝往訪客星剝挾一磨衲

又自贊

清風索我吟明月勸我飲醉倒落花前天地即衾枕



寄題永新昊天觀賀知宮方外軒

君家秘監唐詩客  
飲中八仙渠第一  
君家水部晉仙真  
曾拜東封玉路塵  
祇今孫子方外士  
羽衣霞佩雲為袂  
月下緱山吹鳳笛  
霧裏華陽割龍耳  
何當踞龜食蛤蜊  
大嚼碧藕嬉瑤池  
若見君家兩仙伯  
為儂寄聲好將息

寄題萬安蕭和卿雲岡書院

君不見南軒先生  
以道鳴嶽麓書院  
陶諸生君不見晦  
菴先生妙經學廬  
山書院傍白鹿吾  
鄉蕭君八葉孫雲

岡築齋高入雲芝蘭玉樹爭續文江湖鵲袍爭駿犇願  
師朱張兩先生駟馬高蓋塞里門

題王晉輔專春亭

向來王家癖於馬今來王家癖於花洛陽城裏花如海  
一半移取來君家此花就中最穠麗姚家黃兼魏家紫  
花王更有王中王看却姚魏千花降一春好處君知否  
上巳前頭寒食後千花不用妬渠伊此外春光更屬誰

題王晉輔桂堂

諸天別有金色界金粟如來更奇怪玉露洗面晞金風  
黃雲迎下月姊宮未與羣芳較顏色寒香世界誰能得  
一箇世界一粟中萬粟世界香無窮詩人夢入廣寒殿  
香殺詩人天不管

贈臨川嚴太伯秀才

臨汝嚴夫子撻筇叩敝廬文如漆園壯人似客星孤善  
相遺驕瘦深參得腹腴行看最先進辨論詛諸儒

嚴助  
最先

進辨論天臣數詛  
莊周後為嚴子

送羅季周主簿之官八桂

憶昔相從夜誦時，子垂兩髧我初髭。  
梧桐葉落猶無睡，桃李春歸總不知。  
我已懸車老岩壑，子方歛板走階墀。  
莫嫌衰病人皆棄，桂嶺梅花寄一枝。

乙丑改元開禧元日

開禧元祀更元正，宿雨新收放曉晴。  
夜半梅花添一歲，夢中爆竹報殘更。  
方知人喜天亦喜，作麼鐘鳴雞未鳴。  
老子年齡君莫問，屠蘇飲了更無兄。

立春日

何處新春好深山處士家風光先春柳日色款催花

寄題鄒有常愛蓮亭

道鄉先生有族子卜築富川弄江水更穿兩沼磨碧銅  
分種芙蓉了秋事一沼花白一沼紅新亭恰當紅白中  
此花不與千花同吹香別是濂溪風

題分宜李少度燕谷

君不見向來吹律談天衍能令寒谷回春暖君不見祇

今桂山謝艮齋能回燕谷為春臺謫仙耳孫有仙骨家  
傳謫仙好風月劖開別墅一谷中管領春光醉煙雪艮  
齋作記印此山山與主人千載傳谷中花柳莫放過乞  
取風月三千篇

答胡伯圜贈詩

澹老郎君何永賢渥洼財駕拆金鞭只今兩子似連璧  
一建雙旌開二天白馬將軍震交趾青錢學士即甘泉  
弟兄蕙茂仍蘭發頓有機雲在眼前

答胡仲方贈詩

疇昔昭王渡楚江得萍斗大嚼甘芳因君黃綬作此縣  
問古青蘋何處鄉民樂弦歌愛言偃天將桃李醉河陽  
望郎舊說為邑宰邑宰今看為望郎

病中春雨聞東園花盛

萬類欣欣一老悲物華豈是不佳時病夫自與春無分  
好景非於我獨遺花底報來開已闌雨中過了更曾知  
風光九十今強半又約芳菲隔歲期

雨霽看東園桃李行溪上進退格

藥畧關心正腹煩強排孤悶到東園行穿六六三三徑  
來往紅紅白白間繞樹仰看渾不見隔溪回望不勝繁  
村村桃李家家有脚力酸時坐看山

春盡夜坐

春光草草病中休病眼逢春道是秋祇有青燈憐此老  
伴人無睡照人愁

疾痛呼天天豈知知而不管亦何為偶拈白傅長慶集



又得歡欣片子時

病夫說病訴傍人他自開眉我自顰後有病夫看病句  
不須告訴亦沾巾

去歲四月得淋疾今又四月病猶未愈

去歲四月病如今一歲來越吟三百日涼劑二千杯極  
痛過於割通身總是灾花時久斷酒紅藥為誰開

自遣

莫將一病苦憂煎山尚能遊石可眠匹似病風兼病脚

老夫猶是地行仙

久病小愈雨中端午試筆

病軟欣逢五五辰  
宮衣忽憶拜天恩  
舊時疊雪含風眼  
今看空山雨點痕

愛與陳玄酷作緣  
餘波染指黑爛斑  
呼童汲水無來底  
自掬垂簷一滴慳

春去無花可得攀  
石榴不結却明鮮  
昨朝花發今朝落  
留得梢頭一蒂看

月季元來插得成  
瓶中花落葉猶青  
試將插向蒼苔砌  
小朶忽開雙眼明

送吉州太守胡平一寺正赴召

憶昔乾道遊碧水  
君為秀才儂博士  
逮今嘉泰歸青原  
儂為州民君刺史  
人生離合風中雲  
白髮相逢有幾人  
與君相逢又相別  
不待折柳眉先顰  
如君豈弟民父母  
春風風人夏雨雨  
忽然一夜飛秋霜  
驚殺雁鶩兼豺狼  
政聲無翼到天上  
玉皇詔君登廟廊  
郎星卿月小借路

金華玉堂即高步中興賢閣育鳳麟向來未有乘鴻釣  
祇今宰相破荒了第一衣鉢當傳君

病起覽鏡

病起長新骨居然非舊容眼添佩環帶腰減採花蜂對  
面不相識何人忽此逢吾身無定在更要問窮通

覽鏡忽自問何方一病翁生涯管城外本貫醉鄉中筆  
硯今都廢尊壘久屢空又將數莖雪顚顚見西風

病中感秋

病中一別祇三秋況見西風弄樹頭老去能禁幾回病  
秋來不為別人愁書帷夢覺疑僧榻竹戶涼侵似客舟  
壽外康寧方是福不然徒壽不須休

秋夜

晨興換新衣視身忽潛愕腹皮皺白摺髀肉寬一握沉  
痾兩年餘衰髮半零落且留宿塵垢莫遣新澡濯未濯  
體尚肥既濯肌轉削無髮已是僧有骨不如鶴明年方  
八十似覺九十著

音酌

寡食幸自清辟穀底須學便可作

飛仙御風上雲幕如何肥瘦想猶有秋衣作

夜讀詩卷

幽屏元無恨清愁不自任兩窓兩橫卷一讀一沾襟祇  
有三更月知予萬古心病來謝杯杓吟罷重長吟

病中止酒

平生萬事輕惟以酒自娛當其愛酒時一日不可無老  
來因屬疾不飲五月餘客飲我不羨而況逢麴車見杯  
不思斟見罇不思酤終日但清坐此心長泊如始悟世

人情逐物非一途仕者誇豹蟬貨者珍金珠賜泰嗤原  
貧由勇諂孔迂何物真樂憂何人定巧愚病後復有身  
曠然同太虛其餘君莫問麴生尚可疎

病中喜雨呈李吉州

兩日炎暉烈未收連宵甘澍沛如流大田今日非昨日  
多稼新秋賽舊秋涼氣隔簾深亦透香煙卷袖散難留  
使君小試為霖手便作江西第一州

送戴良輔藥者歸城郭

君欲問淋病便是法外刑封剔備百毒便以虐燄烹玉  
皇夜半勅六丁押差戴君樂病丞倒囊刺手探玉札一  
洗愁肺冰雪清一生百病都好去不但膏肓駟二豎寄  
言仲景與安常古今何代無醫王

寄題張仲寅甘老堂

屏山十論浹聖心甘老十論刮古今古今刮得都見髓  
持獻玉工逢則趾玉皇左相華陽封上與阿旦雙周公  
荐渠金門可登仕金門送渠外臺試渠儂掉頭不肯行



有雪可釣月可畊  
思山紫葳椽來大脣音思江白魚船樣  
箇綠蓑青笠霞上卧不知畢逋明眎東西過

送藥者陳國器

寶憲一舉空朔堊曹霸一筆空凡馬吾鄉藥者有陳生  
一丸洗雪萬藥者庸醫皆笑道旁莎陳生拈出便是玉  
山禾庸醫皆笑淵下水陳生酌來便是上池底也只不  
離神農書書外別得一亡珠也只不出岐伯論論外別  
得舌一寸舊遭痔疾惱殺儂新遭淋疾與合蹤恰如住

在園田國晉楚腹背來夾攻陳生贈我玉困子乃是華  
陽洞中垂龍耳陳生贈我紺葉紗乃是金鴉脚底扶桑  
花汲泉親手煮蠬眼一浣枯腸如浣沙平生舊疾蟬殼  
退秋風吹落青天外更傳枕中鴻寶方戒勿浪傳世天  
藏君不見回岩仙客逢貧子指石成金吾濟爾貧子再  
拜不要金祇覓指頭吾自指

送王長文赴上庠

吾鄉前輩王南賓讀書萬卷筆有神屢登天府獻和璞

玉工過眼珉奪真祇今有孫又奇絕踏雪攜書詣金闕  
玉皇書院碧水中賜子半窓桃玉蟲端能健筆追乃祖  
斗擲寸心瀉千古廣寒掇取第一枝早為雙親開兩眉

賀吉州李守臘雪

任侯妙手佐廬陵民歌敏惠如神明歌聲動天天降瑞  
一夜幻出瓊瑤城麗譙一新玉樓現郡治別起銀設廳  
曉上青原臺上望千門萬戶皆水晶八邑山川一千里  
盡種琪樹璣為英幕僚秉燭爭入賀老夫挹病獨僵臥

寄言賀客此未奇來年玉粒滑流匙萬艘珍珠貢京師  
老夫已草豐年詩

除夕送次公子入京受縣

過眼光陰又歲窮相看父子一樽同春回雨點溪聲裏  
人醉梅花竹影中汝趁暄和朝北闕我扶衰病見東風  
弟兄努力思報國放我滄浪作釣翁

丙寅人日送藥者周叔亮歸吉水縣

拔草不拔根塞水不塞源忽然草生更水長敗却禾稼

仍涵天老夫昔歲得淋疾初謂一日今兩年服藥六千  
六百賤楚望二十二回圓偶逢周郎顧一脉擒二豎發  
藥何用多刀圭起沉痾向來肝腸痛如割今歲疾病全  
然脫捉著根源盡掃除周郎神醫天下無

病中感春

老去春來已薄情體中病後更玲瑯海棠紅釀飛成雪  
楊柳金濃染作青到得當年饒景物不如舊日借園亭  
一杯欲把還休去遮莫鶯花笑獨醒

落花

紅紫成泥泥作塵  
顛風不管惜花人  
落花辭樹雖無語  
別倩黃鸝告訴春

雨中問訊金沙

金沙道是殿羣芳  
不道荼蘼輸一場  
十里紅粧踏青出  
一張錦被晒晴香  
只須舊蔭已無暑  
更有新條如許長  
若恨昨朝來草草  
夜來風雨更禁當

寄題劉正卿雙清軒

吾鄉今代劉更生新序說苑落筆成問君才思寧底巧  
玉泉繞屋共雙清此泉來從何境界銀河飛下雙羅帶  
便好乘槎犯斗星斫桂廣寒天上行

初夏病起曉步東園

低枝碧李壓人頭過雨紅梅滿道周紅日漏雲初試暑  
綠陰酣露已踰秋

病起烏藤強自扶三三徑裏曉晴初鶯聲只在花梢上  
行去行來不見渠

送羅正夫主簿之官餘干

君家人物已數世後有秘丞前給事近來復見鄉先生  
武岡使君五經笥君才自是一世英珠玉照乘仍連城  
妙年已號萬人敵強仕初登千佛名番君小屈習鑿齒  
且與剌頭簿書底即看給札試蘭臺飛上木天校文字  
五月三日早起步東園示幼輿子

雨香不及露華香竹液花膏馥葛嘗儂與曉星成二客  
更無人共上番涼



筠簣茗帚兩無踪  
竊果畦丁職不供  
老子不來纔幾日  
松花榭葉滿庭中

端午病中止酒

病裏無聊費掃除  
節中不飲更愁予  
偶然一讀香山集  
不但無愁病亦無

誠齋集卷四十二